



**Ofisina Sentral di Statistik**

Informashon : (+599 9) 8392300

Adrès: WTC Building, Piscaderabay s/n

E-mail: [info@cbs.cw](mailto:info@cbs.cw)

Website: [www.cbs.cw](http://www.cbs.cw)

Facebook: cbscur

# Komunikado pa Prensa

Willemstad, 17 febrüari 2022

## **Sifra índise di preis pa konsumidó pa luna di desèmber 2021 i sifra di inflashon pa aña 2021**

### **Desaroyo di preisnan pa konsumidó na Kòrsou pa luna di desèmber 2021**

**For di sifra ku Ofisina Sentral di Statistik (CBS) a publiká awe ta indiká ku e nivel di preis promedio a subi levemente ku 0,8% na luna di desèmber 2021 kompará ku luna di novèmber 2021. E sifra di inflashon pa aña 2021 ta 3.8%.**

#### *Desaroyo di preis luna di desèmber 2021 kompará ku luna di novèmber 2021*

E sifra índise di preis pa konsumidó (CPI, “Consumer Price Index”) di Kòrsou na luna di desèmber a subi ku 0.8% kompará ku luna di novèmber 2021. E la desaroyá di 107,7 na novèmber 2021 pa 108,5 na luna di desèmber 2021.


E kambionan di preis spesífiko ku mas a sobresalí durante luna di desèmber 2021 ta; a bira mas karu kerosin (11,3%), silinder di gas (6,3%), medio di transporte (5,7%), tèkstil (5,4%), gasoil (4.6%), gasolin (3.9%), suku i chukulati (1.9%), produkto di lechi (1,8%), spijsvetten (1,7%), batata, berdura i fruta (1.3%) i lo kual a bira mas barata ta awa (-1.3%), dekorashon di bibienda (-1.1%), elektrisidat (-1,0%) i mantenshon di kura (-0.6%)

#### *Desaroyo di preis luna di desèmber 2021 kompará ku luna di desèmber 2020 i sifra di inflashon pa aña 2021*

E CPI di desèmber 2021 (108.5) ta 4.9 porshento mas haltu ku e CPI di desèmber 2020 (103.5). E sifranan aki ta indiká ku e nivel di preis pa konsumidó durante luna di desember 2021 ta 4.9% mas haltu kompará ku e mes un luna na 2020.

E kategorianan ku a kontribuí mas tantu na e subida aki ta komestibel, salubridat, transporte i komunikashon.

*Desaroyo di preis riba término largu: inflashon desèmber 2021*



Inflashon ta reflehá pèrdida di balor di sèn, pues di forsa di kompra, dor di subida di preis di produkto i servisio pa e konsumidó riba término largu (usualmente 12 luna). E sifra di inflashon pues ta duna un indikashon di e subida promedio di kosto di bida, i p’esei ta ser rekomendá komo instrumento pa indeksashon di salario, penshun, ònderstant/ benefisio sosial, suèldu mínimo i otro entrada.

Inflashon den un sierto luna ta ser kalkulá dor di komparashon di e CPI promedio di 12 luna den e luna konserní ku e CPI promedio di 12 luna den mes luna e aña anterior. Si kompará e periodo di e último 12 luna te ku desember 2021 ku mes periodo un aña anterior, ta resultá ku preisnan na averahe a subi ku 3.8 porshento: e CPI promedio di 12 luna a desaroyá di 102.3 na desèmber 2020 pa 106.0 na desèmber 2021.